

**Ammasumik ataatsimiinnermi oqaluuserisassat:**

**Imm. 01 Oqaluuserisassat akuersissutigineri**

**04 Suliassat naliginnaasut**

**Imm. 4.1 Suliniutip Suleqataavunga naammassineqarnera nalilersorneqarneralu**

**06 Paasissutissiissutit**

**Imm. 6.1 Utoqqalinersiaqarneq pillugu Inatsisartut inatsisaata aamma Siusinaartumik pensionisiat pillugit Inatsisartut inatsisaata allanngortinneqarneranut siunnersuut tusarniaavigineranut akissummut ilisimatitsineq**

**Imm. 08 Tamalaat**

Ataatsimiinneq aallartippoq nal. 09:11

*Peqataasut:*

***Atassut***

Anna Karen Hoffmann, Sisimiut

***Siumut***

Hans Frederik Olsen, Siulittaasoq, Sisimiut

Erik Jensen, Sisimiut, oqarasuaatikkut peqataavoq nal. 09:16-miit, Imm. 4.1-miit. Nal. 10:53  
ataatsimiinnermiit anivoq.

***Inuit Ataqatigiit***

Juliane Enoksen, Siulittaasup tullia, Sisimiut, nal. 09:35 ataatsimiinnermiit anivoq.

Carl Christian Olsen, Sisimiut. Nal. 10:55 ataatsimiinnermiit anillappoq.

Axel Lund Olsen, Juliane Enoksen anillammat sinniisutut peqataalerpoq nal. 09:35 oqaluuserisassat  
matoqqasut aallartinnerani.

*Nalunaaruteqarlutik peqataannngitsut:*

*Nalunaaruteqaratik peqataannngitsut*

**Imm. 01 Oqaluuserisassat akuersissutigineri**

**Aalajangiineq**

Akuersissutigineqarpoq.

Juliane Enoksen ataatsimiinnermi matoqqasuni peqataasinnaanani nalunaarpoq Axel Lund Olsen-  
illu sinniisutut peqataanissaa nalunaarutigaa.

## 04 Suliassat naliginnaasut

### **Imm. 4.1 Suliniutip Suleqataavunga naammassineqarnera nalilersorneqarneralu**

*Journalnr.*

#### Tunuliaqutaq

Oktobarimi 2018, Qeqqata Kommunian aamma Tiliq suliniut Suleqataavunga pillugu suleqatigiinnissamik isumaqatigiissuteqarput. Suliniutip siunertaraa innuttaasut innarluutillit amerlanerusut sulilersinneqarnissaat, taamaalillutik inuunerup qanoq issusaanik pitsaanerusumik atugaqalersillugit, namminneq aalajangiisinnaannortillugit, inuiaqatigiinni aningaasarsiornikkut akuliusimasatut misigilersillugit. Suliniummi anguniakkat ilagaat Qeqqata Kommuniani suliffeqarfiit sulisitsisullu pisortatigut akisussaaqataalernissaannut kajumissaarneqassasut, suliffimmik eqaatsumik pilersitsillutik aammalu inummik innarluutilimmik sulisitsisilernermik naleqartitsillutik. Suliniut misiliutaavoq Tiliup kommuninut allanut siaruartilersinnaasaa.

#### Maleruagassatigut tunngavissat

Inuit innarluutillit tapersersorneqarnissaannut Inatsisartut inatsisaat nr. 13, 12. juni 2019-imeersoq. Qeqqata Kommuniani Innarluutilinnut politikkaa 2020-2023

#### Pissutsit atuuttut

Suliniut Suleqataavunga illoqarfimmi suliffeqarfiit suliniummullu eqimattat suleqatigiissutigivaat, tassani Tiliq aamma Qeqqata-kommunia suliniummik aqutsisuullutik, Sisimiuni Maniitsumilu innarluutilinnut immikkoortortami sullissisut kiisalu Sisimiuni Maniitsumilu Majoriami siunnersortit suliummi suliffeqarfiullutik attuumassutillit: Suliffeqarfinnut aqutissiuussineq aamma innuttaasunut aqutissiuussineq.

Suliffeqarfinnut aqutissiuussineq ima ingerlataqarnikuvoq:

- Inunnut innarluutilinnut suliffiusinnaasunik assigiinngitsunik quppersagaaqqamik naatsunik nassuiaasioq.
- Suliffeqarfinnik ataatsimeeqateqarneq, tassani suliffeqarfiit inunnik innarluutilinnik sulisitsilernissaq pillugu paasissutissanik aammalu saaffiginniffigisinnaasaminnik paasissutissinneqarlutik, kiisalu suliffeqarfik akuunerulersitsisutut inuiaqatigiinni akisussaaqataanissaminnut kajumissaarneqarlutik.
- Suliffinni ambassadøreqatigiinnik "Suleqataavunga"-mik pilersitsineq, Sisimiuni Maniitsumilu suliffeqarfiit innarluutilinnik sulisitsilernissaq annertunerusumik sulissutigineratigut pisussaaffeqarlutik.

Innuttaasunut aqutissiuussineq ima ingerlataqarnikuvoq:

- Filmilaaqqanik qaammarsaaneq "Sulisinaavunga" arfineq marlunnik naatsunik filmilaaqqanik imaqarpoq, taakkualu siunertarivaat innarluutillit suliffeqarfinni assigiinngitsuni sulisut oqaluttuarinissaat, taamaalilluni isummat pigiliutiinnakkat qaangerneqarnissaat sulissutigalugu. Filmilaaqqanik qaammarsaaneq Facebookkimi suleqataasullu nittartagaanni saqqummersinneqarput, Qeqqatalu Kommuniani inunnit 2.500 aamma 12.600 akornanni takuneqarlutik.
- Danmarkimi inuit innarluutillit peqatigiiffiisa saqqummersitaannik naleqqussaaneq nutserinerlu, innarluutit assigiinngitsut pillugit, aammalu inunnut innarluutilinnut ilinniartunut- aamma suliffeqarfinni sulisunut suut iluaqutaasinnaanersut aammalu tapersersortaasinnaanersut paasissutissiinerit. Sullissisup aamma Majoriap innuttaasumik

oqaloqatiginninnermi atortut atorsinnaavaat, imaluunniit innuttaasumut tunniunneqarsinnaapput taamaalilluni nammineq innarluut aamma qanigisaasumut paasiuminarnerulersinnaalluni.

- Innuttaasunik sullissineq pitsaanerusoq anguniarlugu kommunimi sullissisut Majoriallu suleqatigiinnerannik nukittorsaaneq.

Atortut tamarmik suliniummi pisariaqartitat paasineqartut aallaavigalugit suliniummi eqimattanit ineriartortinneqarput. Suliffeqarfanni suliniuteqarnermi Arctic Circle Business siunnersuisutut akuutinneqarpoq.

Suliniummi eqimattat iluminni naliliineranni paasineqarpoq:

- Suliniummi atortut pilersinneqartut kommunimi sullissisuniit Majoriamiillu tigulluarneqarput, annerusumillu Sisimiuni ulluinnarmi sullissinnermi atorneqartarlutik. Saniatigut suliffeqarfiit namminersortut aamma MISI innarluutit tapersersuisinnaanermullu suliniutit pillugit paasissutissanik kalaallisut allaqqasunik pissarsisinnaallutik nuannaarutigisorujussuaat. Kommunit allat aamma atortunut soqutiginnipput.
- Suliniutip kommunimi illoqarfiit akimorlugit sullissisut suleqatigiinnerannik nukittorsaaqataavoq.
- Suliniummi eqimattat innarluutillit assigiinngitsut pillugit aammalu innarluuteqarluni suliffimmik paarsisinnaaneq ilikkagaqarfiginikuuaat. Meeqqalli atuarfiannit ilinniaqqiffimmuut imaluunniit suliffimmuut ingerlariaqqinnissaq suli unamminartinneqarpoq. Immikkoortoq taanna suli aallunneqanngilaq, siunissamili periuseqarluni suliniuteqarnermini Tiliup tamanna suliniuteqarfigeqqinniarpa.
- Suliniut ima tigussaasunnagortitsivoq, Maniitsumi innuttaasoq innarluutilik E-GUX-mi ilinniarnermik aallartitsinikuuvoq, aammalu ilinniagallit suliffeqarfiillu annertunerusumik ukkanneqarnerisa kingunerannik innuttaasut innarluutillit sulilersinneqarnikuullutik.
- Suliniutip inunnut innarluutilinnut immikkoortortap Majoriallu suleqatigiinnera nukittorsarnikuuaa. Immikkoortumi siuariartoqqarnikuuvoq, sulili immikkoortut marluusut akornanni suleqatigiinnerup nukittorsarneqarnissaa sulissutigeqqinneqarsinnaavoq.
- Suliniummi peqataasunit malugineqarpoq filmeeqqanik qaammarsaaneq innuttaasut innarluutit pillugit isiginnittariaaseqarnerannut pitsaasumik tiguneqartoq, taamaalillutik innuttaasut inunnik innarluutilinnik nalimisut isiginnittariaasilittut, kissaatilittut aammalu sinnattulittut inissaqartitsilerlutik.
- Suliniummi peqataasut innuttaasunik innarluutilinnik sulilersitsinissaminnik annertunerusumik suliniuteqarnissaminnut kajumilernikuupput.

#### Atuilluartaunissakkut kingunerisinnaasai

Innuttaasut innarluutillit sulilersinneqarnissaat taamaalillutik pisortatigut pitsaasumik aningaasarsiornermut tunniusseqataalerlutik, aammalu inuiaqatigiinnut suliffeqarfiit aqutugalugit peqataallutik tunniusseqataasutut misiginikkut inuunerup qanoq issusaa pitsaasumik misigilernissaannut suliniuteqarnissaq atuilluartauneruvoq. Suliniutip piviusunnagortinneqarnera soqutiginnittunik, Majoriaq, illoqarfanni suliffeqarfiit aamma Tilioq qanimut suleqatigiinnerisigut ingerlanneqarnera atuilluartauneruvoq.

Suliniummi atortut pilersinneqartut kommunimi innarluutilinnut immikkoortortami aammalu immikkoortortani allani ukiuni aggersuni ulluinnarni sulinnermi, oqaloqatiginninnermi aqutissiuussinermilu aallaavittut atorneqarsinnaapput.

#### Aningaasaqarnikkut allaffissornikkullu kingunerisinaasai

Tiliup 2020-p ukiaani suliniummi malitseqartitsineq tunniussassalu tigunikuuai, taamaalilluni Qeqqata Kommunia suliniummi pisussaaffeerulluni.

Qeqqata Kommuniatali suliffeqarfittut aalajangernikuuaa Suleqataavunga-mi siunniussaqlarluni atsiogatigiinnermi atsiorniarluni, kingornalu Qeqqata Kommuniata suliffeqarfiup iluani nammineerluni akuutitsinerulernissaq inissaqartitsinissarlu suliniutigalugit ingerlateqqilernikuullugit.

#### Allaffeqarfiup naliliinera

Allaffeqarfik naliliivoq, suliniut inuit innarluutillit suliffeqarfinni periarfissaannik nukittorsaaqataasoq. Siammasissumik innuttaasut suliffeqarfiillu qitiutillugit suleqatigiinnikkut anguneqarpoq. Tiliup kommunillu suleqatigiinnera nukittornikuuvoq, taamaalilluni inunnut innarluutilinnut immikkoortortami suliniuteqarnermi siunissami suleqatigiinneq iluaqutaasinnaalluni.

Allaffeqarfik naliliivortaaq suliniummik aammalu suliffinni ambassadøreqatigiit ”Suleqataavunga”-mik pimoorussilluni ingerlatsineq Qeqqata Kommuniani Innarluutilinnut politikkimi anguniakkanut tunniusseqataasussaasoq.

#### **Innersuussut**

Atugarissaarnermut immikkoortortap Atugarissaarnermut Ataatsimiititaliamut innersuussutigaa  
- paasissutissiissut tusaatissatut tiguneqassasoq

#### **Aalajangiineq**

Tusaatissatut tiguneqarpoq.

#### **Ilanngussat**

1. Qeqqata Kommuniata aamma Tilioq-p akornanni suleqatigiinnissamut isumaqatigiissut
2. Innarluutit aammalu suliffiit pillugit ilitersuutit
3. Suleqataavunga, siunniussaqlarluni atsiogatigiinnermi atsiugaq
4. Quppersagaraq: Suliffiit suussusaat pillugit

## **06 Paasissutissiissutit**

### **Imm. 6.1 Utoqqalinersiaqarneq pillugu Inatsisartut inatsisaata aamma Siusinaartumik pensionisiat pillugit Inatsisartut inatsisaata allanngortinneqarneranut siunnersuut tusarniaavigineranut akissummut ilisimatitsineq**

*Journalnr. XX.XX.XX*

#### Tunuliaqutaq

Isumaginninnermut, Ilaqutariinnut Inatsisinillu Atuutsitsinermut Naalackersuisoqarfiup “Uunga siunnersuut: Utoqqalinersiaqarneq pillugu Inatsisartut inatsisaata aamma Siusinaartumik pensionisiat pillugit Inatsisartut inatsisaata allanngortinneqarnerat pillugu Inatsisartut inatsisaat nr. xx, xx. Xxx 2021-meersoq” Qeqqata Kommunanut tusarniaassutigineqarpoq ullunik suliffiusunik tallimanik akinissamut killilerlugu.

#### Maleruagassatigut tunngavissat

Utoqqalinersiaqarneq pillugu Inatsisartut inatsisaat nr. 20, 23. November 2015-imeersoq Siusinaartumik pensionisiat pillugit Inatsisartut inatsisaat nr. 40, 9. December 2015-imeersoq

#### Pissutit atuuttut

Utoqqalinersiaqalersinnaanermut ukiorititat qaffakkiartuaartinneqarnerat ilutigalugu 1. Januaari 2021 atuutilertumik ukiorititat 67-imut qaffanneqarput, tassungalu kommunalbestyrelse utoqqalinersiat pillugu inatsimmi §1 imm. 2 aamma 3 naapertorlugu ukiorititat ukiumik ataatsimik saneqqussinnaavaa, pineqartoq ukiut 35-t sinnerlugit timikkut tarnikkulluunniit oqimaatumik suliaqarnikkut nungullarsimappat.

Innuttaasulli 65-inik ukioqalersimasut ukiuni 35-ni timikkut tarnikkullu sulinerikkut nunguullarsimanertik toqqammavigalugu utoqqalinersiaqalernissamik qinnuteqartut isumagineqarnissaat Naalackersuinikkut kissaataavoq.

Siunnersuutip matumap innuttaasut 65-inik ukioqalersimasut ukiunilu 35-ni timikkut tarnikkullu sulerulussimanermikkut nunguullarsimasut, kommunalbestyrelsemut utoqqalinersiaqalernissamik qinnuteqarsinnaanissaannik periarfississavai.

#### Atuilluartuunissakkut kingunerisinnaasai

Innuttaasut 65-inik ukioqalersimasut aaliangersakkami pineqartut, timikkut tarnikkullu nunguullarluinnannginnissaat, taamatullu aamma peqqissumik utoqqaliartornissaat inuiaqatigiinnullu eqeersimaarlutik peqataasinnaanissaat siunnersuutip qulakkiissavaa. Tamassumap nassatarissavaa pineqartup inuunermini atugarissaarnerulluni peqqinnerusumik inuuneqarsinnaanera.

#### Aningaasaqarnikkut allaffissornikkullu kingunerisinaasai

Aningaasaqarnikkut aningaasartuutissat 2021-mut aningaasanut inatsimmi ilaatillugit akuersissutigineqarput siunnersuullu manna aningaasatigut immikkut aningaasartuutitaqassanngilaq.

### Allaffeqarfiup naliliinera

Qeqqata Kommunia imaattumik tusarniaanermut akissuteqarpoq:

“Qeqqata Kommuniata siullertut Naalakkersuisut inussiarnersumik kaammattorusuppaat kommuunit Naalakkersuisullu akornanni isumaqatigiissutigineqarsimasoq, minnerpaamik sapaatit akunneri tallimat sulinnigiffeqarfiit avataatigut tusarniaanerit ingerlanneqartarnissaat maleqqullugit. Qeqqata Kommunia aammattaaq kaammattuutigerusuppaat Naalakkersuisut nassuiaateqalaartarnissaat tusarniaanerit sooq taamak tuaviortigisumik ingerlanneqartarneranik.

Qeqqata Kommuniata iluarisimaarpaa ukiuni 35-ini timikkut tarnikkulluunniit oqimaatsumik suliaqarnermikkut nunguullarsimasunut utoqqalinersiaqarnissamut ukiorititat 65-iussammata. Kommuunip maluginiarpaa aaliangersagaq najoqqutaralugu qinnuteqartartut maannamut ukiumut ikittuararsuusut, taamaattorli tamanna periarfissaanissaa taperserlugu.

Kommune siunnersuut pillugu allanik oqaaseqaatissaqanngilaq.

Tusarniaanermut akissut allaffissornikkut suliarineqarpoq.”

### **Innersuussut**

Atugarissaarnermut Immikkoortortaqaqfiup Atugarissaarnermut Ataatsimiititaliamut innersuussutigaa:

- “Uunga siunnersuut: Utoqqalinersiaqarneq pillugu Inatsisartut inatsisaata aamma Siusinaartumik pensionisiat pillugit Inatsisartut inatsisaata allanngortinneqarnerat pillugu Inatsisartut inatsisaat nr. xx, xx. Xxx 2021-meersoq” pillugu tusarniaanermi akissummut paasissutissiineq tusaatissatut tigussagaat.

### **Aalajangiineq**

Tusaatissatut tiguneqarpoq. Aammaarluni ataatsimiititaliap tusarniaanermi Naalakkersuisoqarfimmiit piffissaliunneqartoq sivikippallaarnera uparuarpaat.

### **Ilanngussat**

1. “Uunga siunnersuut: Utoqqalinersiaqarneq pillugu Inatsisartut inatsisaata aamma Siusinaartumik pensionisiat pillugit Inatsisartut inatsisaata allanngortinneqarnerat pillugu Inatsisartut inatsisaat nr. xx, xx. Xxx 2021-meersoq” pillugu allakkiaq
2. “Uunga siunnersuut: Utoqqalinersiaqarneq pillugu Inatsisartut inatsisaata aamma Siusinaartumik pensionisiat pillugit Inatsisartut inatsisaata allanngortinneqarnerat pillugu Inatsisartut inatsisaat nr. xx, xx. Xxx 2021-meersoq”
3. Utoqqalinersiaqarneq pillugu Inatsisartut inatsisaata aamma Siusinaartumik pensionisiat pillugit Inatsisartut inatsisaata allanngortinneqarnerat pillugu naliginnaasumik oqaaseqaatit
4. Qeqqata Kommuniata tusarniaanermut akissutaa

**Imm. 08 Tamalaat**

Soqanngilaq.